

Groundstation lo cuminza funciona na november

ORANJESTAD(AAN)-Minister di Trafico y Comunicacion sr. Angel Bermudez, sr. Don Mansur, Minister di Asuntonan Economico, sr. Ben Marapen y sr. Edwin Croes a haci un bishita di trabao na diferente departamentonan na Setar y en especial na e groundstation. Sr. Herman Richardson, director suplente di Setar a duna un splicacion amplio encuanto e Intelcentrum, cual ta encera e.o. un telexcentrale digital, expansion di 4000 number den e central di Playa etc.

E groundstation cu trafico lo ta cla a promer di November. E telexcentrale lo ta cla pa 15 di December '88, e central di telefoon digital lo ta cla na Maart '89 y e microwave entre Aruba y Curacao lo keda cla na Juli '89 aproximadamente.

Lo cambia e sistema di telefoon for di analogo pa digital, cual sistema ta ofrece mas facilidadnan tanto awor como pa den futuro. Aruba ta un di e poco paisnan cu tin e posibilidad pa implementa e



sistema digital y e ventaha cu Aruba tin ta cu e ta chikito y e sistema lo por ser poni den un solo biaha.

Minister Bermudez a splica cu e groundstation na nifica un inversion di mas o menos 10 Milion Florin. Tambe lo bay introduci un sistema di fiber optics, cual ta un tecnica nobo ariba tereno di telecomunicacion y cu lo significa un inversion grandi tambe.

Minister Bermudez a declara cu Aruba mester tin un infraestructura

di

telecomunicacion adecua cu ta sostene no solamente e economia, pero cu por duna servicio na henter comunidad.

E groundstation cu lo cuminza funciona na November lo beneficia Aruba financieramente pasobra awor

telecomunicacion no mester pasa mas via Antiyas, locual tabata tin "switchcost" haltu.

E telexcentrale nobo lo spaar Aruba aproximadamente 100 Mil Florin, suma cu antes mester a paga na Antiyas pa luna pa manda telexman. Tur esey ta ganashi cu lo por paga e inversion bek.

Personal di Setar for di principio a bay e.o. na fabricanan tanto na Merca como Hulanda pa siña opera y con pa mantene e equipo y aparatonan sofistica aki.

E equiponan aki tin un sistema totalmente distinto pa combati incendio y tin un alarma apart. E equipo pa combati incendio ta pa medio di gas, helium, cual ta paga candela den un paar di seconde, sin causa daño na e aparato.

Minister Bermudez y Minister Mansur a ser ricibi pa sr. Jan Groen, coordinador di e proyecto; sr. Jan Wittebal, director financiero, sr. Johan Wittenberg, director general di Setar, sr. Marcial St. Jago, transmission manager y sr. Herman Richardson director suplente di Setar.

P.P.N. awe ta cumpli nan prome aniversario

ORANJESTAD(AAN) -- Señor H.A.Werleman, presidente di P.P.N., a duna di conoce na DIARIO cu awe 17 di October ta exactamente un aña pasa cu e partido a worde funda.

Segun Werleman, binti un (21) persona a dicidi di lanta P.P.N. pa di e forma ey mantene nan dignidad y honor como ser

humano.

Binti un persona a fada di ser usa y manipula y a kibra cu e partido na cual nan tabata pertenecer.

Den e 21 personanan aki tin dos miembro di Staten cu a dicidi di mantene nan asiento, aunque cu nan a kibra cu e partido ariba cual lista nan a ser eligi como tal.

Tambe nan a sigui sostene e gobierno di coalicion pa e siguiente motibonan:

1. No tabata tin ningun problema entre e partido cu nan tabata representa y e gobierno di coalicion.

2. E gobierno tabata cumplimentalmente cu e programa di gobernacion cual grandemente nan a yuda traha.

3. Nan no a haya cu ta hustifica pa entrega nan asiento na un lider di partido di cual nan

tabata convenci, y e prueba cu e ta un manipulador egoista cu no tin bienestar general di Aruba na pecho.

4. Nan no a haya cu tabata hustifica pa crea un crisis politico na Aruba den un periodo asina delicado den historia di Aruba, djis pa complace cu un lider cu ainda mester madura.

Segun Werleman, den e proximo eleccion e dos miembronan di Staten sostene pa e demas 19 personanan lo somete nan mes na huicio di e pueblo di Aruba. E pueblo e ora ey lo demostra si e ta di acuerdo cu e posicion cu P.P.N. a tuma. Den aña cu P.P.N. ta existi el a duna prueba di su derecho di existencia. Segun Werleman, P.P.N. a demostra seriedad pa traha den un direccion politico nobo, dunando asina realce na su nomber.

Segun Werleman e logro mas grandi di P.P.N. den e aña cu a pasa ta cu P.P.N. a yuda mantene estabilidad politico y tranquilidad den gobernacion, creando asina e clima necesario pa adelanto economico, educacional, cultural, deportivo y social.

DIARIO

E MATUTINO DI
PUEBLO